

ԳԼՈՒԽ ԺԴ.

1920 ԹԻԻ ԱՄԱՌԸ

Բողջելիկեան շարժումը ճնշելուց յետոյ, իրերի տրամաբանական թելադրանքով, կառավարութեան առջև եկաւ թրքարնակ վայրերի գրաման հարցը: Մի շարք շրջաններ՝ Զանգիբասարում, Վեդիբասարում, Զուլ, Կողբ և այլն — էլ չենք խօսում Շարուր-Նախիջևանի մասին — մնում էին Հայաստանի իշխանութեան նկատմամբ ապստամբ վիճակում. ո՛չ միայն չէին ճանաչում նրան, այլ և անվերջ յարձակումներով, սպանութիւններով ու թալանով դժարացնում էին Հայաստանի կազմակերպման և վերաշինութեան գործը: Շարուր-Նախիջևանում իշխանութիւնը փաստօրէն անցել էր Անգուրայի զինւորական գործակալ Խալիլ-բէյի ձեռքը: Սրա ազդեցութիւնը տարածւում էր և Վեդի բասարի ու Զանգի բասարի վրա, որոնք ամրացւած էին ոչ միայն տեղական այլ և թիւրք ասկերներով: Զանգի բասարում փորւած էին անառիկ դիրքեր: Իլիսի-Ղորուղի գիւղում դրւած էր Թնդանօթ: Ռազմագիտական կարևոր դիրքերը բռնւած էին զօրամասերով ու գնդացիներով: Գլխաւոր կէտերը միացւած էին իրար հետ հեռախօսով: Թիւրքիայից ստացւում էր մեծ քանակութեամբ փամփուշտ ու ռազմամթերք: Զինւորական տեսակէտից, շատ լաւ կազմակերպւած ու ամրացւած էր և Բէոյիւք Վեդին: Այս բոլոր շրջանները միասին կազմում էին «Հարաւ-Արևմտեան Ազրբէջան»ը, ուր իշխանութիւնը խառն էր՝ թիւրք-ազրբէջանեան:

Օգտւելով մայիսեան դէպքերից յետոյ ստեղծւած ռազմական ու հոգեբանական նպաստաւոր դրութիւնից՝ կառավարութիւնը անցաւ գործի. յունիս 18-ին Զանգի բասարին ներկայացւեց վերջնազիր՝ ճանաչելու Հայաստանի իշխանութիւնը, գինաթափելու և հեռացնելու թիւրք-ազրբէջանեան գործակալներին: Չստանալով պատասխան՝ կառավարութիւնը հրամայեց Վաղարշապատի զօրախմբին՝ գէնքի ուժով գրաւելու Զանգիբասարը: Եւ մի քանի օրում շրջանը գրաւեց:

Զօրախմբի հրամանատար գնդ. Շահմազեանը այսպէս էր նկարագրում զինւորական գործողութիւնները.

«Յունիս 19-ին Նորագաւթի զօրասիւնը ճեղքեց հակառակորդի դիրքերը Աղջա-Ղչաղ-425 բարձունք-411 բարձունք ճակատի վրա և գրաւեց Հալի-էյլաղ գիւղը: Այսպիսով ողջ գանդիբասարեան դիրքերի բանալին խլեց խովարարների ձեռքից, որով և Զանգիբասարի բախտը նախորոշեց: Փարաքարի զօրասիւնը գրաւեց Գէոյգիւմբէթ, Բէլալի և Արբաթ գիւղերը: